

四庫全書薈要

• 乾隆御覽本

經部

欽定四庫全書薈要

經部

禮記注疏卷五十二

詳校官編修臣程嘉謨



禮記注疏卷五十二

漢鄭氏注 唐陸德明音義 孔穎達疏

中庸

天命之謂性率性之謂道脩道之謂教注天命謂天所

命生人者也是謂性命木神則仁金神則義火神則禮
水神則信土神則知孝經說曰性者生之質命人所稟
受度也率循也循性行之是謂道脩治也治而廣之人

放傲之是曰教音義

率所律反知音智下知者大道也知皆同放方往反傲胡教反

者不可須臾離也可離非道也注道猶道路也出入動

作由之離之惡乎從也音義

離力智反下及注同惡音烏

是故君子

戒慎乎其所不睹恐懼乎其所不聞注小人閒居為不

善無所不至也君子則不然雖視之無人聽之無聲猶

戒慎恐懼自脩正是其不須臾離道音義

睹丁古反恐匡勇反注同

閒音閑下同

莫見乎隱莫顯乎微故君子慎其獨也注慎獨

者慎其閒居之所為小人於隱者動作言語自以為不

見睹不見聞則必肆盡其情也若有佔聽之者是為顯

見甚於衆人之中為之音義

見賢通反注顯見同
一音如字佔勅廣反

喜怒

哀樂之未發謂之中發而皆中節謂之和中也者天下

之大本也和也者天下之達道也注中為大本者以其

含喜怒哀樂禮之所由生政教自此出也音義

樂音洛
注同中

丁仲反下注
為之中同

致中和天地位焉萬物育焉注致行之至

也位猶正也育生也長也音義

長丁疏正義曰此節明
文反疏中庸之德必脩

道而行謂子思欲明中庸先本於道天命之謂性者天
本無體亦無言語之命但人感自然而生有賢愚吉凶

若天之付命遣使之然故云天命老子云道本無名強
名之曰道但人自然感生有剛柔好惡或仁或義或禮
或智或信是天命自然故云謂之性率性之謂道率備
也道者通物之名言依循性之所感而行不令違越是
之曰道感仁行仁感義行義之屬不失其常合於道理
使得通達是率性之謂道脩道之謂教謂人君在上脩
行此道以教於下是脩道之謂教也道也者不可須臾
離也者此謂聖人脩行仁義禮智信以為教化道猶道
路也道者開通性命猶如道路開通於人人行於道路
不可須臾離也若離道則礙難不通猶善道須臾離棄
則身有患害而生也可離非道也者若荒使塞澀之處
是可離棄以非道路之所由猶如凶惡邪僻之行是可
離棄以亦非善道之行故云可離非道也是故君子戒
慎乎其所不睹者言君子行道先慮其微若微能先慮
則必合於道故君子恒常戒於其所不睹之處人雖目
不睹之處猶戒慎況其惡事睹見而肯犯乎故君子恒

常戒慎之恐懼乎其所不聞者言君子恒恐迫畏懼於所不聞之處言雖耳所不聞恒懷恐懼之不睹不聞猶須慎懼况睹聞之處恐懼可知也莫見乎隱莫顯乎微者莫無也言凡在衆人之中猶知所畏及至幽隱之處謂人不見便即恣情人皆佔聽察見罪狀甚於衆人之中所以恒須慎懼如此以罪過愆失無見於幽隱之處無顯露於細微之所也故君子慎其獨也者以其隱微之處恐其罪惡彰顯故君子之人恒慎其獨居言雖曰獨居能謹慎守道也喜怒哀樂之未發謂之中者言喜怒哀樂緣事而生未發之時湛然虛靜心無所慮而當於理故謂之中發而皆中節謂之和者不能寂靜而有喜怒哀樂之情雖復動發皆中節限猶如鹽梅相得性行和諧故云謂之和中也者天下之大本也者言情慾未發是人性初本故曰天下之大本也和也者天下之達道也者言情慾雖發而能和合道理可通達流行故曰天下之達道也致中和天地位焉萬物育焉者致至

也位正也育生長也言人君所能至極中和使陰陽不
錯則天地得其正位為生成得理故萬物得其養育為
注正義曰云天命謂天所命生人者也是謂性命者案
易乾象云乾道變化各正性命是也云木神則仁者皇
氏云東方春春主施生仁亦主施生云金神則義者秋
為金金主嚴殺義亦果敢斷決也云火神則禮者夏為
火火主照物而有分別禮亦主分別云水神則信冬主
閉藏充實不虛水有內明不欺於物信亦不虛詐也云
土神則知者金木水火土無所不載土所含義者多知
亦所含者衆故云土神則知云孝經說曰性者生之質
命人所稟受度也不云命者鄭以通解性命為一故不
復言命但性情之義說者不通亦略言之賀瑒云性之
與情猶波之與水靜時是水動則是波靜時是性動則
是情案左傳云天有六氣降而生五行生於含生之類
皆感五行生矣唯人獨稟秀氣故禮運云人者五行之
秀氣被色而生既有五常仁義禮智信因五常而有六

情則性之與情似金與銀印銀印之用非金亦因金而有銀印情之所用非性亦因性而有情則性者靜情者也故樂記云人生而靜天之性也感於物而動性之欲也故詩序云情動於中是也但感五行在人為五常得其清氣備者則為聖人得其濁氣闇者則為愚人降聖以下愚人以上所稟或多或少不可言一故分為九等孔子云唯上智與下愚不移二者之外逐物移矣故論語云性相近習相遠也亦據中人七等也

仲尼曰君子中庸小人反中庸君子之中庸也君子而時中小人之中庸也小人而無忌憚也注庸常也用中為常道也反中庸者所行非中庸然亦自以為中庸也君子而時中者其容貌君子而又時節其中也小人而

無忌憚其容貌小人又以無畏難為常行是其反中庸

也音義

小人之中庸也王肅本作小人之反中庸也忌憚徒旦反忌畏也憚難也難乃旦反行下孟反

子曰中庸其至矣乎民鮮能久矣注鮮罕也言中庸為

道至美顧人罕能久行音義

中庸其至矣乎一本作中庸之為德其至矣乎鮮息

淺反下及注同罕胡坦反希也少也

子曰道之不行也我知之矣知者過

之愚者不及也道之不明也我知之矣賢者過之不肖

者不及也人莫不飲食也鮮能知味也注罕知其味謂

愚者所以不及也過與不及使道不行唯禮能為之中

音義

注有知音智下文大知也子知

子曰道其不行矣夫注

閔無明君教之音義

扶夫音

疏

正義曰此一節是子思引仲尼之言廣明中庸之行

賢者過之不肖者不及也中庸之道鮮能行之君子中庸者庸常也君子之人用中以為常故云君子中庸小人反中庸者小人則不用中為常是反中庸也君子之中庸也君子而時中者此覆說君子中庸之事言君子之為中庸容貌為君子心行而時節其中謂喜怒不過節也故云君子而時中小人之中庸也小人而無忌憚也者此覆說小人反中庸之事言小人為中庸形貌為小人而心行無所忌憚故云小人而無忌憚也小人將此以為常亦以為中庸故云小人之中庸也子曰中庸其至矣乎者前既言君子小人不同此又歎中庸之美人寡能久行其中庸之德至極義乎民鮮能久矣者但寡能長久而行鮮罕也言中庸為至美故人罕能久行

之子曰道之不行也我知之矣者此覆說人寡能行中庸之事道之所以不行者言我知其道之不行所由故云我知之矣知者過之愚者不及也者以輕於道故過之以遠於道故不及道之不明也我知之矣者言道之所以不顯明我亦知其所由也賢者過之不肖者不及也者言道之不行爲易故知者過之愚者不及道之不明爲難故云賢者過之不肖者不及是以變知稱賢變愚稱不肖是賢勝於智不肖勝於愚也人莫不飲食也鮮能知味也者言飲食易也知味難也猶言人莫不行中庸但鮮能久行之言知之者易行之難所謂愚者不能及中庸也案異義云張華辨鮓師曠別薪符朗爲青州刺史善能知味食雖知棲半露食鵝知其黑白此皆晉書文也子曰道其不行矣夫者夫子既傷道之不行又哀閔傷之云時無明君其道不復行也注正義曰反中庸者所行非中庸者言用非中以為常是反中庸故云所行非中庸云然亦自以為中庸也者解經小人之

中庸雖行忌事亦自謂為中庸云其容貌君子而又時節其中也者解經君子而時中云其容貌小人又以無畏難為常行者解經小人而無忌憚既無忌憚則不時節其中庸也

子曰舜其大知也與舜好問而好察邇言隱惡而揚善執其兩端用其中於民其斯以為舜乎注邇近也近言而善易以進又察而行之也兩端過與不及也用其中於民賢與不肖皆能行之也斯此也其德如此乃號為

舜舜之言充也音義

與音餘下強與皆同好疏正義曰呼報反下同易以鼓反此一經

明舜能行中庸之行先察近言而後至於中庸也舜其大知也與者既能包於大道又能察於近言即是大知

也執其兩端用其中於民者端謂頭緒謂知者過之愚者不及言舜能執持愚知兩端用其中道於民使愚知俱能行之其斯以為舜乎者斯此也以其德化如此故號之為舜注正義曰案謚法云受禪成功曰舜又云仁義盛明曰舜皆是道德充滿之意故言舜為克也

子曰人皆曰予知驅而納諸罟獲陷阱之中而莫之知辟也人皆曰予知擇乎中庸而不能期月守也注予我

也言凡人自謂有知人使之入罟不知辟也自謂擇中

庸而為之亦不能久行言其實愚又無恒音義

罟音古罔之總

名獲胡化反尚書傳云捕獸機檻陷陷沒之陷阱才性反本或作罟同阱穿地陷獸也說文云罟或為阱字也

辟音避注如辟辟疏正義曰此一經明無知之人行中
害皆同期音基庸之事予我也世之愚人皆自謂

言我有知驅而納諸罟獲陷阱之中而莫之知辟也者
此為無知之人設譬也罟網也獲謂柞梧也陷阱謂坑
也穿地為坎豎鋒刃於中以陷獸也言禽獸被人所驅
納於罟網獲陷阱之中而不知違辟似無知之人為嗜
欲所驅入罪禍之中而不知辟即下文是也擇乎中庸而
不能期月守也者鄭云自謂擇中庸而為之亦不能久
行言其實愚又無恒也小人自為選擇中庸而心行亦
非中庸假令偶有中庸亦不能期月而守之如入
也臨

子曰回之為人也擇乎中庸得一善則拳拳服膺而弗

失之矣注拳拳奉持之貌音義

拳音權又起阮反徐羗
權反膺徐音應又於陵

反奉考
勇反

子曰天下國家可均也爵祿可辭也白刃可蹈

也中庸不可能也注言中庸難為之難音義

徒報反

疏

正義曰此一節是夫子明顏回能行中庸言中庸之難也得一善則拳拳服膺而弗失之矣者言顏回選

擇中庸而行得一善事則形貌拳拳然奉持之膺謂胃膺言奉持守於善道弗敢棄失子曰天下國家可均也者天下謂天子國謂諸侯家謂卿大夫也白刃可蹈也者言白刃雖利尚可覆蹈而行之中庸不可能也者言在諸事雖難猶可為之唯中庸之道不可能也為知者過之愚者不及言中庸難為之難也

子路問強注強勇者所好也音義

強其良反下同好呼報反

子曰南

方之強與北方之強與抑而強與注言三者所以為強

者異也抑辭也而之言女也謂中國也音義

女音汝下抑女同

寬柔以教不報無道南方之強也君子居之注南方以

舒緩為強不報無道謂犯而不校也音義

校交考反報也

衽金

革死而不厭北方之強也而強者居之注衽猶席也北

方以剛猛為強音義

衽而審反又而鳴反厭於艷反

故君子和而不流

強哉矯中立而不倚強哉矯國有道不變塞焉強哉矯

國無道至死不變強哉矯注此抑女之強也流猶移也

塞猶實也國有道不變以趨時國無道不變以辟害有

道無道一也矯強貌塞或為色音義

依彼反徐其蟻反

疏

正義曰此一節明中庸之道亦兼中國之強子路問孔子美顏回能擇中庸言已有強故問之問強中亦

兼有中庸否庾氏云問強中之中庸者然此問之亦如

論語云子謂顏淵曰用之則行舍之則藏唯我與爾有

是夫子路曰子行三軍則誰與之類是也子曰南方之

強與北方之強與抑而強與者抑語助也而之言女也

女子路也夫子將答子路之問且先反問子路言強有

多種女今所問問何者之強為南方為北方為中國女

所能之強也子路之強行中國之強也寬柔以教不報

無道南方之強也君子居之者反問既竟夫子遂為虛

解之南方謂荆揚之南其地多陽陽氣舒散人情寬緩

和柔假令人有無道加已已亦不報和柔為君子之道

故云君子居之衽金革死而不厭北方之強也而強者

居之者衽卧席也金革謂軍戎器械也北方沙漠之地

居之者衽卧席也金革謂軍戎器械也北方沙漠之地

其地多陰陰氣禍急故人性剗猛恒好鬪爭故以甲鎧
為席寢宿於中至死不厭非君子所處而強梁者居之
然唯云南北不云東西者鄭冲云是必南北互舉蓋與
東西俗同故不言也故君子和不流強哉矯此以下
皆述中國之強也流移也矯亦強貌也不為南北之強
故性行和合而不流移心行強哉形貌矯然中立而不
倚強哉矯者中正獨立而不偏倚志意強哉形貌矯然
國有道不變塞焉強哉矯者若國有道守直不變德行
充實志意強哉形貌矯然國無道至死不變強哉矯者
若國之無道守善至死性不改變志意強哉形貌矯然
注正義曰此抑女之強也何以知之上文既說三種之
強又見南方之強又見北方之強唯抑而之強未見故
知此經所云者是抑女之強也云流猶移也者以其性
和同不流移隨物合和而不移亦中庸之德也云國有
道不變以趨時者國雖有道不能隨逐物以求榮利今
不解變已志以趨會於時也云矯強貌者矯是壯大之

形故云
強貌也

子曰素隱行怪後世有述焉吾弗為之矣注素讀為攻

城攻其所係之係係猶鄉也言方鄉辟害隱身而行俛

誦以作後世名也弗為之矣恥之也音義

係音素鄉本又作嚮許亮

反下皆同俛久委反下同誦音決

君子遵道而行半途而廢吾弗能已

矣注廢猶罷止也弗能已矣汲汲行道不為時人之隱

行音義

汲音悉隱行下孟反

君子依乎中庸遯世不見知而不悔

唯聖者能之注言隱者當如此也唯舜為能如此音義

遜本又作適
同徒頓反

君子之道費而隱注言可隱之節也費猶

俛也道不費則仕音義

費本又作拂同扶
弗反徐音弗注同

夫婦之愚可

以與知焉及其至也雖聖人亦有所不知焉夫婦之不

肖可以能行焉及其至也雖聖人亦有所不能焉注與

讀為贊者皆與之與言匹夫匹婦愚耳亦可以其與有

所知可以其能有所行者以其知行之極也聖人有不

能如此舜好察邇言由此故與音義

以與音預注皆與
之與以其與同好

呼報反故
與音餘

天地之大也人猶有所憾注憾恨也天地至

大無不覆載人尚有所恨焉況於聖人能盡備之乎音

義

憾本又作感胡暗反注同

故君子語大天下莫能載焉語小天下

莫能破焉注語猶說也所說大事謂先王之道也所說

小事謂若愚不肖夫婦之知行也聖人盡兼行詩云爲

飛戾天魚躍于淵言其上下察也注察猶著也言聖人

之德至於天則爲飛戾天至於地則魚躍於淵是其著

明於天地也音義

爲悅專反字又作爲戾力計呂結二反躍羊灼反著張慮反下同

君

子之道造端乎夫婦及其至也察乎天地注夫婦謂匹

夫匹婦之所知所行音義

造在疏正義曰此一節論夫

中庸入明中庸之道初則起於匹夫匹婦終則徧於天地素隱行怪後世有迷焉者素鄉也謂無道之世身鄉幽隱之處應須靜默若行怪異之事求立功名使後世有所迷焉吾弗為之矣者恥之也如此之事我不能為之以其身雖隱遯而名欲彰也君子遵道而行半塗而廢者言君子之人初既遵循道德而行當須行之終竟今不能終竟猶如人行於道路半途而自休廢猶罷止也吾弗能已矣者已猶止也吾弗能如時人半途而休止言汲汲行道無休已也君子依乎中庸者言君子依行中庸之德若值時無道隱遯於世雖有才德不為時人所知而無悔恨之心如此者非凡人所能唯聖者能然若不能依行中庸者雖隱遯於世不為人所知則有悔恨之心也君子之道貴而隱者注云言可隱之節費猶促也言君子之人遭值亂世道德違費則隱而不

仕若道之不貴則當仕也夫婦之愚可以與知焉者言天下之事千端萬緒或細小之事雖夫婦之愚偶然與知其善惡若芻蕘之言有可聽用故云與知及其至也雖聖人亦有所不知焉者言道之至極如造化之理雖聖人不知其所由故云及其至也雖聖人亦有所不知焉夫婦之不育可以能行焉者以行非至極故也前文據其如此文據其行以其知行有異故別起其文但知之易行之難知之易故上文云夫婦之愚行之難故此經云夫婦之不育不育勝於愚也及其至也雖聖人亦有所不能焉者知之與行之皆是至極既是至極故聖人有不能也天地之大也人猶有所憾者憾恨也言天地至大無物不養無物不覆載如冬寒夏暑人猶有怨恨之猶如聖人之德無善不包人猶怨之是不可備也中庸之道於理為難大小兼包始可以備也故君子語大天下莫能載焉者語說也大謂先王之道言君子語說先王之道其事既大天下之人無能勝載之者語小

天下莫能破焉者若說細碎小事謂愚不肖事既纖細
天下之人無能分破之者言事似秋毫不可分破也詩
云鳶飛戾天魚躍于淵言其上下察也者此大雅旱麓
之篇美文王之詩引之者言聖人之德上至於天則鳶
飛戾天是翱翔得所聖人之德下至於地則魚躍于淵
是游泳得所言聖人之德上下明察詩本文云鳶飛戾
天喻惡人遠去魚躍于淵喻善人得所此引斷章故與
詩義有異也君子之道造端乎夫婦者言君子行道初
始造立端緒起於匹夫匹婦之所知所行者及其至也
察乎天地者言雖起於匹夫匹婦所知所行及其至極
之時明察於上下天地也注正義曰素讀為攻城攻其
所據之條司馬法文言身隱而行倜傥以作後世之名
若許由洗耳之屬是也不為時人之隱行者謂作倜傥
求名是也君子以隱終始行道不能止也唯舜為能如
此者知者史記云舜耕於歷山漁於雷澤陶於河濱是
不見知而不悔與讀為贊者皆與之與者士冠禮云其

蹇冠者贊者皆與謂干與也云舜好察通言由此故與者即愚夫愚婦有所識知故也與語助也聖人盡兼行者謂兼行大小之事小事則愚夫愚婦所知行大事則先王之道前文云雖聖人有所不知不能此云大事聖人兼行之者前云有所不知不能謂於小事不勝匹夫匹婦耳非謂大事不能也故此云盡兼行之

子曰道不遠人人之為道而遠人不可以為道注言道即不遠於人人不能行也詩云伐柯伐柯其則不遠執柯以伐柯睨而視之猶以為遠注則法也言持柯以伐木將以為柯近以柯為尺寸之法此法不遠人人尚遠之明為道不可以遠音義

柯古何反睨徐音詣睨晚也

故君子以人

治人改而止注言人有罪過君子以人道治之其人改則止赦之不責以人所不能忠恕違道不遠施諸已而不願亦勿施於人注違猶去也君子之道四丘未能一焉所求乎子以事父未能也所求乎臣以事君未能也所求乎弟以事兄未能也所求乎朋友先施之未能也注聖人而曰我未能明人當勉之無已庸德之行庸言之謹有所不足不敢不勉有餘不敢盡言顧行行顧言之謹猶常也言德常行也言常謹也聖人之行實過於

人有餘不敢盡常為人法從禮也音義

行行皆下孟反注聖人之行同

或一諸皆如字

君子胡不慥慥爾注君子謂衆賢也慥慥守實

言行相應之貌音義

慥七到反行下孟反應於陵反舊音應對之應

君子素其

位而行不願乎其外素富貴行乎富貴素貧賤行乎貧

賤素夷狄行乎夷狄素患難行乎患難君子無入而不

自得焉注素皆讀為係不願乎其外謂思不出其位也

自得謂所鄉不失其道音義

難乃旦反下同

在上位不陵下在

下位不援上注援謂牽持之也音義

援音圓注同

止已而不

求於人則無怨上不怨天下不尤人注無怨人無怨之

者也論語曰君子求諸己小人求諸人音義

已音紀怨於願反又

於元反下及注並同

故君子居易以俟命小人行險以徼幸注易

猶平安也俟命聽天任命也險謂傾危之道疏

正義曰此一節

明中庸之道去人不遠但行於己則外能及物道不遠人者言中庸之道不遠雖於人身但人能行之於己則是中庸也人之為道而遠人不可以為道者言人為中庸之道當附近於人謂人所能行則已所行可以為道若違理離遠則不可施於己又不可行於人則非道也故云人之為道而遠人不可以為道也詩云伐柯伐柯其則不遠執柯以伐柯斲而視之猶以為遠此豈風伐柯之篇美周公之詩柯斧柄也周禮云柯長三尺博三

寸則法也言伐柯斲也柯柄長短其法不遠也但執柯
視而視之猶以為遠言欲行其道於人其法亦不遠但
近取法於身何異持柯以伐柯人猶以為遠明為道之
法亦不可以遠即所不願於上無以交於下所不願於
下無以事上況是在身外於他人之處欲以為道何可
得乎明行道在於身而求道也故君子以人治人改而
止者以道去人不遠言人有過君子當以人道治此有
過之人改而止若人自改而休止不須更責不能之事
若人所不能則已亦不能是行道在於己身也忠恕違
道不遠者忠者內盡於心恕者外不欺物恕付也付度
其義於人違去也言身行忠恕則去道不遠也施諸已
而不願亦勿施於人者諸於也他人有一不善之事施
之於己己所不願亦勿施於人人亦不願故也所求乎
子以事父未能也者言此四者欲明求之於他人必先
行之於己欲求其子以孝道事己已須以孝道事父母
故云所求乎子以事父未能也恐人未能行之夫子聖

人聖人猶曰我未能行凡人當勉之無已所求乎臣以
事君未能也者譬如已是諸侯欲求於臣以忠事已已
當先行忠於天子及廟中事尸是全臣道也所求乎朋
友先施之未能也者欲求朋友以恩惠施已則已當先
施恩惠於朋友也庸德之行庸言之謹者庸常也謂自
脩已身常以德而行常以言而謹也有所不足不敢不
勉者謂已之才行有所不足之處不敢不勉而行之有
餘不敗盡者謂已之才行有餘於人常持謙退不敢盡
其才行以過於人言顧行者使言不過行恒顧視於行
行顧言者使行副於言謂恒顧視於言也君子胡不慥
慥爾者慥慥守實言行相應之貌胡猶何也既顧言行
相副君子何得不慥慥然守實言行相應之道也素其
位者素鄉也鄉其所居之位而行其所行之事不願行
在位外之事論語云君子思不出其位也鄉富貴之中
行道於富貴謂不驕不淫也鄉貧賤之中則行道於貧
賤謂不諂不攝也鄉夷狄之中行道於夷狄夷狄雖陋

唯隨其俗而守道不改鄉患難之中行道於患難而臨危不傾守死於善道也君子無入而不自得焉者言君子所入之處皆守善道在上位不陵下此素富貴行富貴也若身處富貴依我常正之性不使富貴以陵人若以富貴陵人是不行富貴之道在下位不援上者此素貧賤行貧賤也援牽持也若身處貧賤則安之宜令自樂不得援牽富貴若以援牽富貴是不行貧賤之道正已而不求於人則無怨此素夷狄行夷狄也若身入夷狄夷狄無禮義當自正已而行不得求於彼人則彼人無怨已者論語云言忠信行篤敬雖之夷狄不可棄上不怨天下不尤人此素患難行患難也尤過也責也苟皆應之患難則亦甘為不得上怨天下尤人故論語云不怨天不尤人是也故君子居易以俟命者易謂平安也言君子以道自處恒居平安之中以聽待天命也小人行險以徼倖者小人以患自居恒行險難傾危之事以徼求榮幸之道論語曰不仁者不可以久處約是也

子曰射有似乎君子失諸正鵠反求諸其身注反求於

其身不以怨人畫布曰正樓皮曰鵠音義

正音征注同鵠古毒反注

同正鵠皆鳥名也一曰正正也鵠直也大射則張皮侯而棲鵠賓射張布侯而設正也樓細兮反

君子

之道辟如行遠必自邇辟如登高必自卑注自從也邇

近也行之以近者卑者始以漸致之高遠音義

辟音譬下同邇

音爾卑音婢又如字注同

詩曰妻子好合如鼓瑟琴兄弟既翕和樂

且耽宜爾室家樂爾妻帑注琴瑟聲相應和也翕合也

耽亦樂也古者謂子孫曰帑此詩言和室家之道自近

者始音義

好吁報反翁許急反樂音洛下及注同耽丁南反帶音奴子孫也本又作捰同尚書傳毛

詩箋並云子也杜預注左傳云妻子也應應對之應和胡卧反

子曰父母其順矣乎注

謂其教令行使室家順疏

正義曰以上雖行道在於己身故此一節覆相行道在身

之事以射譬之射有似乎君子者言凡人之射有似乎君子之道失諸正鵠反求諸其身者諸於也求責也正謂賓射之侯鵠謂大射之侯言射者失於正鵠謂失於中正鵠不責他人反鄉自責其身言君子之人失道於外亦反自責於己君子之道譬如行遠必自邇譬如登高必自卑者自從也邇近也卑下也行之以遠者近之始升之以高者卑之始言以漸至高遠不云近者遠始卑者高始但勤行其道於身然後能被於物而可謂之高遠耳詩云妻子好合如鼓瑟琴兄弟既翕和樂且耽此小雅常棣之篇美文王之詩記人引此者言行道之

法自近始猶如詩人之所云欲和遠人先和其妻子兄弟故云妻子好合情意相得如似鼓彈瑟與琴音聲相和也兄弟盡皆俞合情意和樂且復耽之耽之者是相好之甚也宜爾室家樂爾妻帑者宜善爾之室家愛樂爾之妻帑帑子也古者謂子孫為帑故甘誓云子則帑戮汝於人則妻子為帑於鳥則鳥尾為帑左傳云以害鳥帑是也子曰父母其順矣乎者因工和於遠人先和室家故此一經次之父母其順矣乎謂父母能以教令行乎室家其和順矣乎言中庸之道先使室家和順乃能和順於外即上云道不遠施諸已

子曰鬼神之為德其盛矣乎視之而弗見聽之而弗聞體物而不可遺注體猶生也可猶所也不有所遺言萬物無不以鬼神之氣生也使天下之人齊明盛服以承

祭祀洋洋乎如在其上如在其左右注明猶潔也洋洋

人想思其傍儉之貌音義

齊側皆反本亦作齋洋音羊傍皇薄到反謂左右也徐方

岡反儉徐於

詩曰神之格思不可度思矧可射思注格

來也矧況也射厭也思皆聲之助言神之來其形象不

可億度而知事之盡敬而已況可厭倦乎音義

格古百反度侍

洛反注同矧詩忍反注同射音亦厭於艷反字又作厭下同盡子忍反

夫微之顯誠之不

可揜如此夫注言神無形而著不言而誠音義

揜音掩於檢反

此夫音扶疏

正義曰此節明鬼神之道無形而能顯著張慮反誠信中庸之道與鬼神之道相似亦從微

至者不言而自誠也。體物而不可遺者，體猶生也可。猶所也。言萬物生而有形體，故云體物而不可遺者，言鬼神之。道生養萬物，無不周偏而有所遺。言萬物無不以鬼神之氣生也。使天下之人齊明盛服，以承祭祀者，明猶潔也。言鬼神能生養萬物，故天下之人齊戒明潔，盛飾衣服，以承祭祀，洋洋乎如在其上，如在其左右者，言鬼神之形狀，人想像之，如在上，如在左右。想見其形也。詩曰：神之格思，不可度思，矧可射思者，格來也。思，辭也。矧，況也。射，厭也。此大雅抑之詩，刺厲王之詩。詩人刺時人祭祀懈倦，故云神之來至，以其無形，不可度知。恒須恭敬，況於祭祀之末，可厭倦之乎？言不可厭倦也。記者引詩明鬼神之所尊敬也。夫微之顯者，言鬼神之狀微昧不見，而精靈與人為言，凶是從微之顯也。誠之不可揜者，言鬼神誠信不可揜蔽。善者必降之以福，惡者必降之以禍。如此夫者，此詩人所云何可厭倦。夫語助也。此鬼神即與易繫辭云是故知鬼神之情。

狀與天地相似以能生萬物也案彼注木火之神生物
金水之鬼終物彼以春夏對秋冬故以春夏生物秋冬
終物其實鬼神皆能生物終物也故此云體物而不可
遺此雖說陰陽鬼神人之鬼神亦附陰陽之鬼神故此
云齊明盛服以承祭
祀是兼人之鬼神也

子曰舜其大孝也與德為聖人尊為天子富有四海之

內宗廟饗之子孫保之注保安也音義

與音餘

故大德必

得其位必得其祿必得其名必得其壽注名令聞也音

義

問音

故天之生物必因其材而篤焉注材謂其質性

也篤厚也言善者天厚其福惡者天厚其毒皆由其本

而為之故栽者培之傾者覆之注栽讀如文王初載之

載栽猶殖也培益也今時人名草木之植曰栽築牆立

板亦曰栽栽或為茲覆敗也音義

栽依注音災將才反注同植也培蒲回反

覆芳伏反載之載並音災本或作哉同

詩曰嘉樂君子憲憲令德宜民宜

人受祿于天保佑命之自天申之故大德者必受命注

憲憲興盛之貌保安也佑助也音義

嘉戶嫁反詩本作假音同假嘉也皇

音加善也憲音顯注同音如字佑音祐下注同

疏

正義曰此一節明中庸之德故能富有天下受天之

命也子孫保之者師說云舜禪與禹何言保者此子孫承保祭祀故云保周時陳國是舜之後故大德必得其

位者以其德大能覆養天下故必得其位如孔子有大德而無其位以不應土錄雖有大德而無其位也案援神契云丘為制法主黑錄蒼代蒼黃言孔子黑龍之精不合代周家木德之蒼也孔演圖又云聖人不空生必有所制以顯天心丘為木鐸制天下法是也必得其壽者據舜言之而夫子不長壽以勤憂故也故天之生物必因其材而篤焉者材謂質性也篤厚也言天之所生隨物質性而厚之善者因厚其福舜禹是也惡者因厚其毒桀紂是也故凶凶然而舜受禪也故裁者培之者栽殖也培益也言道德自能豐殖則天因而培益之傾者覆之者若無德自取傾危者天亦因而覆敗之也詩曰嘉樂君子憲憲令德者此大雅嘉樂之篇美成王之詩詩嘉憲也憲憲與威之貌詩人言善樂君子此成王憲憲然有令善之德案詩本文憲憲為顯顯與此不同者齊魯韓詩與毛詩不同故也宜民宜人受祿于天保佑命之自天申之故大德者必受命者宜民謂宜養萬民

宜人謂宜官人其德如此故受福于天佑助也保安也
天乃保安佑助命之為天子又申重福之作記者引證
大德必受命之義則舜之為也注正義曰裁讀如文王
初載之載者案詩大明云文王初載天作之合彼注云
載識也言文王生適有所識天為之生配謂生太如此
載為栽植者載容兩義亦得為識亦得為殖此對傾者
覆之故以為殖云築牆立板亦曰栽者案莊
二十九年左傳云水昏正而栽謂立板築也

子曰無憂者其唯文王乎以王季為父以武王為子父
作之子述之注聖人以立法度為大事子能述成之則
何憂乎堯舜之父子則有凶頑禹湯之父子則寡令聞
父子相成唯有文王武王纘大王王季文王之緒壹戎

衣而有天下身不失天下之顯名尊為天子富有四海之內宗廟饗之子孫保之注續繼也緒業也戎兵也衣讀如殷聲之誤也齊人言殷聲如衣虞夏商周氏者多矣今姓有衣者殷之冑與壹戎殷者壹用兵伐殷也音

義

續徐音纂哉管反大音泰下及注大王皆同壹戎衣依注衣作殷於巾反謂一用兵伐殷也尚書依字讀

謂一著戎衣而天下大定冑與直救反下音餘

武王末受命周公成文武之德

追王大王王季上祀先公以天子之禮斯禮也達乎諸侯大夫及士庶人父為大夫子為士葬以大夫祭以士

父為士子為大夫葬以士祭以大夫期之喪達乎大夫
三年之喪達乎天子父母之喪無貴賤一也注末猶老
也追王大王王季者以王迹起焉先公組紺以上至后
稷也斯禮達於諸侯大夫士庶人者謂葬之從死者之
爵祭之用生者之祿也言大夫葬以大夫士葬以士則
追王者改葬之矣期之喪達於大夫者謂旁親所降在
大功者其正統之期天子諸侯猶不降也大夫所降天
子諸侯絕之不為服所不臣乃服之也承葬祭說期三

年之喪者明于事父以孝不用其尊卑變音義

末亡通反追王

于況反注追王同期音基注同組音祖紺古闇反組紺

大王之父也

亦曰諸盤盤音置留反以上時掌反不為

服于疏

正義曰此一節明夫子論文王武王聖德相承

偶反疏

王有天下上能追尊大王王季因明天子以下

及士庶人葬祭祀之禮各隨文解之以王季為父以武

王為子父作之子述之者言文王以王季為父則王季

能制作禮樂文王奉而行之文王以武王為子武王又

能述成文王之道故無憂也武王續大王王季文王之

緒者續繼也緒業也言武王能續繼父祖之業以王天

下也查戎衣而有天下者戎兵也言一用兵伐殷而勝

之也武王末受命者此美周公之德也末猶老也謂武

王年老而受命平定天下也斯禮也達乎諸侯大夫及

士庶人者斯此也言周公尊崇先公之禮非直天子所

行乃下達於諸侯大夫士庶人等無間尊卑皆得上尊

祖父以已之祿祭其先人猶若周公以成王天子之禮
祀其先公也父為大夫子為士葬以大夫祭以士者謂
父既為大夫祭以士禮貶其先人而云尊之者欲明以
已之祿祀其先人也期之喪達乎大夫者欲見大夫之
尊猶有期喪謂旁親所降在大功者得為期喪還著大
功之服故云達乎大夫若天子諸侯旁期之喪則不為
服三年之喪達乎天子者謂正統在三年之喪父母及
適子并妻也達乎天子者言天子皆服之不云父母而
云三年者包適子也天子為后服期以三年包之者以
后卒必待三年然後娶所以達子之志故通在三年之
中是以昭十五年左傳云穆后崩太子壽卒叔向云王
一歲而有三年之喪二馬是包后為三年也直云達乎
天子不云諸侯者諸侯旁親尊同則不降故喪服大功
章云諸侯為姑姊妹嫁於國君者是也父母之喪無貴
賤一也者唯父母之喪無問天子及士庶人其服並同
故云無貴賤一也注正義曰案尚書武成云一戎衣謂

一著戎衣而滅殷此云一者以經武王繼大王王季文
王三人之業一用滅殷對三人之業為一耳由三人之
業故一身滅之鄭必以衣為殷者以十一年觀兵于孟
津十三年滅紂是再者戎服不得稱一戎衣故以為殷
故注云齊人言殷聲如衣末猶老也者謂文王受命十
一年武王觀兵于孟津白魚入王舟是老而受命受命
後七年而崩故鄭注洛誥文王受赤雀武王俯取白魚
皆七年是也云追王大王王季者以王述起焉者案詩
頌閔宮云大王居岐之陽寔始翦商是王述起也云先
公組紺以上至后稷也者組紺大王之父一名諸盤周
本紀云亞圍卒于太公叔類立太公卒于古公亶父立
又世本云亞圍雲生太公組紺諸盤則叔類組紺諸盤
是一人也此又云追王大王王季上祀先公則先公之
中包后稷也故云組紺以上至后稷也案司服云享先
王則衾冕先公則鷩冕以后稷為周之始祖祫祭於廟
當同先王用衾則先公無后稷也故鄭注司服云先公

不啻至諸盤若四時常祀惟后稷及太王王季之等不
得廣及先公故天保云禴祠烝嘗于公先王是四時常
祀但有后稷諸盤以下故鄭注天保云先公謂后稷至
諸盤此皆盡望經上下釋義故不同或有至字誤也云
則追王者改葬之矣者以太王王季身為諸侯葬從死
者之爵則太王王季祇得為諸侯葬禮不得言追王從
天子法故知追王之時而更改葬用天子禮案大傳云
武王追王太王王季王季歷此云周公追王不同者武
王既伐紂追王布告天下周公追而改葬故不同也云
期之喪達乎大夫者謂旁親所降在大功者熊氏云此
對天子諸侯故云期之喪達乎大夫其實大夫為大功
之喪得降小功小功之喪得降總麻是大功小功皆達
乎大夫熊氏又云天子為正統之喪適婦大功適孫之
婦小功義或然但無正文耳云所不臣乃服之也者喪
服傳云始封之君不臣諸父昆弟封君之子不
臣諸父而臣昆弟但不臣諸父昆弟者皆以本服服也

子曰武王周公其達孝矣乎夫孝者善繼人之志善述
人之事者也春秋脩其祖廟陳其宗器設其裳衣薦其
時食注脩謂掃糞也宗器祭器也裳衣先祖之遺衣服
也設之當以授尸也時食四時祭也音義掃悉報反糞弗運反本亦

作撰亦作拊同

宗廟之禮所以序昭穆也序爵所以辨貴賤也

序事所以辨賢也旅酬下為上所以逮賤也燕毛所以
序齒也注序猶次也爵謂公卿大夫士也事謂薦羞也
以辨賢者以其事別所能也若司徒奉牛宗伯共雞牲

矣文王世子曰宗廟之中以爵為位崇德也宗人授事

以官尊賢也旅酬下為上者謂若特牲饋食之禮賓弟

子兄弟之子各舉解於其長也逮賤者宗廟之中以有

事為榮也燕謂既祭而燕也燕以髮色為坐祭時尊尊

也至燕親親也齒亦年也音義

昭穆常逸反穆又作繆音同逮本又作逌同音

代燕於見反別彼列反饋其位反解音至長丁文反下謂長同

踐其位行其禮奏其樂

敬其所尊愛其所親事死如事生事亡如事存孝之至

也注踐猶升也其者其先祖也踐或為饋郊社之禮所

以事上帝也宗廟之禮所以祀乎其先也注社祭地神

不言后土者省文音義

省色領反

明乎郊社之禮禘嘗之義

治國其如示諸掌乎注示讀如寘諸河干之寘寘置也

物而在掌中易為知力者也序爵辨賢尊尊親親治國

之要音義

示依注音寘之豉反易以豉反知力音智本亦無力字治之要也治直吏反一本作治國

之要治疏

正義曰以前經論文王武王聖德相承此論則如字武王周公上成先祖脩其宗廟行郊社之禮

所以能治國如置物掌中也各隨文解之夫孝者善繼人之志者人謂先人若文王有志伐紂武王能繼而承之尚書武成曰予小子其承厥志是善繼人之志也善述人之事者也者言文王有文德為王基而周公制禮

以贊述之故洛誥云考朕昭子刑乃單文祖德是善述人之事也此是武王周公達孝之事宗廟之禮所以序昭穆也者序謂次序爵謂公卿大夫士也序爵所以辨貴賤也者序謂次序爵謂公卿大夫士也謂祭祀之時公卿大夫各以其爵位齒列而助祭祀是辨貴賤也故文王世子云宗廟之中以爵為位崇德也宗人授事以官尊賢也是也序事所以辨賢也者事謂薦羞也序謂次序所供祭祀之事若司徒奉牛司馬奉羊宗伯共雞是分別賢能堪任其官也旅酬下為上所以逮賤也者旅衆也逮及也謂祭末飲酒之時使一人舉解之後至旅酬之時使卑者二人各舉解於其長者卑下者先飲是下者為上賤人在先是恩意先及於賤者故云所以逮賤也案特牲饋食之禮主人洗爵獻長兄弟獻衆兄弟之後衆賓弟子于西階兄弟弟子于東階各舉解於其長也弟子等皆是下賤而得舉解是有事於宗廟之中是其榮也又制受爵是逮賤也燕毛所以序齒也者言

祭未燕時以毛髮為次序是所以序年齒也故注云燕謂既祭而燕也燕以髮色為坐祭時尊尊也至燕親親也踐其位行其禮者踐升也謂孝子升其先祖之位行祭祀之禮也治國其如示諸掌乎注云示讀如寘諸河干之寘寘置也者若能明用序爵辨賢尊親則治理其國其事為易猶如置物於掌中也

哀公問政子曰文武之政布在方策其人存則其政舉

其人亡則其政息注方版也策簡也息猶滅也音義

方策

初草反版音板本亦作板人道敏政地道敏樹注敏猶勉也樹謂殖

草木也人之無政若地無草木矣敏或為謀夫政也者

蒲盧也注蒲盧蜾蠃謂土蜂也詩曰螟蛉有子蜾蠃負

之螟蛉桑蟲也蒲盧取桑蟲之子去而變化之以成為

己子政之於百姓若蒲盧之於桑蟲然

音義蒲盧並如字爾雅云

螺藏蒲盧即今之細腰蜂也一名蠋蛸螺音果藏力果反本亦作螺音同蜂芳封反字亦作蛸同螟莫瓶反蛉

音零已音紀

故為政在人注在於得賢人也取人以身脩身

以道脩道以仁注取人以身言明君乃能得人仁者人

也親親為大義者宜也尊賢為大親親之殺尊賢之等

禮所生也注人也讀如相人偶之人以人意相存問之

言音義

殺色界反徐所例反

在下位不獲乎上民不可得而治矣

此句其屬在下著脫誤重在此音義

治直吏反一音如字脫音奪重直用

反故君子不可以不脩身思脩身不可以不事親思事

親不可以不知人思知人不可以不知天注言脩身乃

知孝知孝乃知人知人乃知賢不肖知賢不肖乃知天

命所保佑天下之達道五所以行之者三曰君臣也父

子也夫婦也昆弟也朋友之交也五者天下之達道也

知仁勇三者天下之達德也所以行之者一也注達者

常行百王所不變也音義

知音智下近乎知注言有知皆同

或生而知

之或學而知之或困而知之及其知之一也注困而知

之謂長而見禮義之事已臨之而有不足乃始學而知

之此達道也音義

長丁丈反
已音紀

或安而行之或利而行之

或勉強而行之及其成功一也注利謂貪榮名也勉強

恥不若人音義

強其兩
反注同

疏

正義曰此一節明哀公問政於孔子孔子答以為政之道

在於取人脩身并行達道有五行之者三今各隨文解之文武之政布在方策者言文王武王為政之道皆布列在於方牘簡策其人存則其政舉者雖在方策其事久遠此廣陳為政之道其人謂賢人舉猶行也存謂道德存在也若得其人道德存在則能興行政教故云舉也其人亡則其政息者息滅也其人若亡謂道德滅亡

不能興舉於政教若位無賢臣政所以滅絕也人道敏政者敏勉也言為人君當勉力行政地道敏樹者樹殖草木也言為地之道亦勉力生殖也人之無政若地無草木地既無心云勉力者以地之生物無倦似若人勉力行政然也夫政也者蒲盧也者蒲盧取桑蟲之子以為己子善為政者化養他民以為己民若蒲盧然也故為政在人者言君行善政則民從之故欲為善政者在於得賢人也取人以身者明君欲取賢人先以脩正己身則賢人至也脩身以道者言欲脩正其身先須行於道德也脩道以仁者言欲脩道德必須先脩仁義仁者人也親親為大者仁謂仁恩相親偶也言行仁之法在於親偶欲親偶疏人先親已親然後比親及疏故云親親為大義者宜也尊賢為大者宜謂於事得宜即是其義故云義者宜也若欲於事得宜莫過尊賢故云尊賢為大親親之殺尊賢之等禮所生也者五服之節降殺不同是親親之衰殺公卿大夫其爵各異是尊賢之等

禮者所以辨明此上諸事故云禮所生也在下位不獲
乎上者鄭謂此句應在下章者脫誤重在此耳故君子
不可以不脩身思脩身不可以不事親言思念脩身之
道必先以孝為本故云不可以不事親思事親不可以
不知人既思事親不可不先擇友取人也思知人不可
以不知天欲思擇人必先知天時所佑助也謂人作善
降之百祥作不善降之百殃當捨惡脩善也五者天下
之達道也五者謂君臣父子夫婦昆弟朋友之交皆是
人間常行道理事得開通故云達道也知仁勇三者天
下之達德也言知仁勇人所常行在身為德故云天下
之達德也言百王用此三德以行五道五事為本故云
道三者為末故云德若行五道必須三德無知不能識
其理無仁不能安其事無勇不能果其行故必須三德
也所以行之者一也言百王以來行此五道三德其義
一也古今不變也或生而知之謂天生自知也或學而
知之謂因學而知之或困而知之得臨事有困由學乃

知及其知之一也言初知之時其事雖別既知之後並皆是知故云及其知之一也或安而行之謂無所求為安靜而行之或利而行之謂貪其利益而行之行此五事得其榮名於已無害則利而行之也故論語云知者利仁是也或勉強而行之或畏懼罪惡勉力自強而行之及其成功一也雖行之有異及其所行成功是一也言皆得成功矣皇氏云所知所行謂上五道三德今謂百行皆然非唯三五而已也

子曰好學近乎知力行近乎仁知恥近乎勇知斯三者則知所以脩身知所以脩身則知所以治人知所以治人則知所以治天下國家矣注言有知有仁有勇乃知脩身則脩身以此三者為基音義

好吁報反近附近之
近行皇如字徐下孟

反 凡為天下國家有九經曰脩身也尊賢也親親也敬

大臣也體羣臣也子庶民也來百工也柔遠人也懷諸

侯也注體猶接納也子猶愛也遠人蕃國之諸侯也音

義子如字徐將吏反下句故此蕃方元反脩身則道立尊賢則不惑親親

則諸父昆弟不怨敬大臣則不眩體羣臣則士之報禮

重子庶民則百姓勸來百工則財用足柔遠人則四方

歸之懷諸侯則天下畏之注不惑謀者良也不眩所任

明也音義眩玄疏正義曰前文夫子答哀公為政須脩身知人行五道三德之事此以下夫

子更為哀公廣說脩身治天下之道有九種常行之事
又明脩身在於至誠若能至誠所以贊天地動鬼神也
博厚配地高明配天各隨文解之此一節覆明上生而
知之學而知之困而知之好學近乎知者則前文或學
而知之蓋能好學無事不知故云近乎知也力行近乎
仁者此則前文或利而行之以其勉力行善故近乎仁
也知恥近乎勇者覆前文困而知之及勉強而行之以
其知自羞恥勤勉遇事不避危難故近乎勇也前經生
而知之不覆說者以其生知自然合聖故不須覆說也
凡為天下國家有九經者此夫子為哀公說治天下國
家之道有九種常行之事論九經之次目也體羣臣也
者體謂接納言接納羣臣與之同體也子庶民也者謂
子愛庶民也來百工也者謂招來百工也脩身則道立
者此一經覆說行九經則致其功用也脩身則道立者
謂脩正其身不為邪惡則道德興立也尊賢則不惑者
以賢人輔弼故臨事不惑所謀者善也敬大臣則不眩

者眩亦惑也以恭敬大臣任使分明故於事不惑前文
不惑謂謀國家大事此云不眩謂謀國家衆事但所謀之
事大小有殊所以異其文體羣臣則士之報禮重者羣
臣雖賤而君厚接納之則臣感君恩故為君死於患難
是報禮重也子庶民則百姓勸子愛也言愛民如子則
百姓勸勉以事上也來百工則財用足百工興財用也
君若賞賚招來之則百工皆自至故國家財用豐足柔
遠人則四方歸之遠人謂蕃國之諸侯四方則蕃國也
懷諸侯則天下畏之懷安撫也君若安撫
懷之則諸侯服從兵強土廣故天下畏之

齊明盛服非禮不動所以脩身也去讒遠色賤貨而貴
德所以勸賢也尊其位重其祿同其好惡所以勸親親
也官盛任使所以勸大臣也忠信重祿所以勸士也時

使薄斂所以勸百姓也日省月試既廩稱事所以勸百
工也送往迎來嘉善而矜不能所以柔遠人也繼絕世
舉廢國治亂持危朝聘以時厚往而薄來所以懷諸侯
也注同其好惡不特有所好惡於同姓雖恩不同義必
同也尊重其祿位所以貴之不必授以官守天官不可
私也官盛任使大臣皆有屬官所任使不親小事也忠
信重祿有忠信者重其祿也時使使之以時日省月試
考校其成功也既讀為餽餽廩稍食也橐人職曰乘其

事考其弓弩以下上其食音義

齊側皆反去起呂反遠于萬反好惡呼報反下

鳥路反又並如字注同斂力驗反既依注音餽許氣反廩彼錦反一本又力錦反稱尺證反朝直遙反稟苦報

反一音古老疏正義曰此一節說行九經之法齊明威反上時掌反正服者齊謂整齊明謂嚴明威服謂正其

衣冠是脩身之體也此等非禮不動是所以勸脩身尊其位重其祿同其好惡所以勸親親也者尊其位謂授

以大位重其祿謂重多其祿位崇重而已不可任以職事同其好惡好謂慶賞惡謂誅罰言於同姓既有親疎

恩親雖不同義必須等故不特有所好惡勸親親也者尊位重祿以勉之同其好惡以勵之是勸親親也官盛

任使所以勸大臣也官盛謂官之盛大有屬官者當令任使屬官不可以小事專勞大臣大臣懷德故云所以

勸大臣也日省月試既廩稱事所以勸百工也既廩謂飲食糧廩也言在上每日省視百工功程每月試其所謂

作之事又飲食糧廩稱當其事功多則廩厚功少則廩薄是所以勸百工也治亂持危者諸侯國內有亂則治計之危弱則扶持之厚往而薄來所以懷諸侯也厚往謂諸侯還國王者以其財賄厚重往報之薄來謂諸侯貢獻使輕薄而來如此則諸侯歸服故所以懷諸侯也注正義曰尊重其祿位者言同姓之親既非賢才但尊重其祿位榮貴之而已不必授以官守也云大臣皆有屬官所任使不親小事也者若周禮六卿其下各有屬官其細碎小事皆屬官為之是不親小事也云既讀為餼餼廩稍食也者以既與廩連文又與餼字聲同故讀既為餼稍食者謂稍給之故周禮月終均其稍食是也引橐人職者證其餼廩稱事案周禮夏官橐人掌弓矢之材其職云乘其事乘謂計算其所為之事考其弓弩謂考校弓弩之善惡多少以下上其食下謂賤退上謂增益善者則增上其食惡者則減其食故也

凡為天下國家有九經所以行之者一也凡事豫則立不豫則廢言前定則不跲事前定則不困行前定則不疚道前定則不窮注一謂當豫也跲躓也疾病也人不

能病之音義

孟路其反音給行下疏正義曰此一節

唯在豫前謀之故云所以行之者一也一謂豫也言前定則不跲者案字林云跲躓也躓謂行倒蹶也將欲發言能豫前思定然後出口則言得流行不有躓蹶也事前定則不困者困乏也言欲為事之時先須豫前思定則臨事不因行前定則不疚者疚病也言欲為行之時豫前思定則行不疚病道前定則不窮者言欲行道之時豫前謀定則道無窮也注正義曰人不能病之者解經行前定則不疚人若行不豫前先定人或不信病害

之既前定而後行
故人不行病害也

禮記注疏卷五十二

禮記注疏卷五十二考證

中庸子曰中庸其至矣乎○注疏本此及下二節俱相連更不盡斷故必讀注疏而後知章句之精也後凡分章無理處仿此

君子之道費而隱注言可隱之節也費猶俛也道不費則仕○臣召南按注疏以素隱行怪及此章為一節

因有兩隱字偶同遂強解之費字音弗尤為難解朱子斷此自為一章而釋之曰費用之廣也隱體之微

也費符味反理始可通

父母其順矣乎疏即上云道不遠施諸已○臣召南按

文勢當云忠恕違道不遠施諸已而不願亦勿施於人也道不遠上脫三字施諸已下脫九字

壹戎衣注衣讀如殷○朱子讀衣字

追王太王王季注則追王者改葬之矣○臣召南按古

未見有改葬之事鄭臆說耳

夫政也者蒲盧也注謂土蜂也○沈括謂是蒲葦

三者天下之達德也疏五事為本故曰道三者為末故曰德○臣召南按此疏謬矣達德可云末乎

子曰好學近乎知○注疏以此下另為章因有子曰二字也朱子曰子曰二字衍文又曰家語亦載此章而其文尤詳成功一也之下有公曰子之言美矣至矣寡人實固不足以成之也故其下復以子曰起辭今無此問而猶有子曰二字蓋子思刪其繁文以附於篇而所刪有不盡者今當為衍文也

柔遠人也注遠人蕃國之諸侯也○臣召南按此則遠人與諸侯是一事不應並列為九經矣朱子以無忘賓旅解之是也

尊其位重其祿疏重其祿謂重多其祿位崇重而已○位崇重而已上富有但祿二字

凡事豫則立注一謂當豫也○臣召南按注甚精所當豫者誠是也疏云一謂豫也非注之意

禮記注疏卷五十二考證

禮記注疏卷五十三

漢鄭氏注 唐陸德明音義 孔穎達疏

中庸

在下位不獲乎上民不可得而治矣注獲得也言臣不
得於君則不得居位治民獲乎上有道不信乎朋友不
獲乎上矣信乎朋友有道不順乎親不信乎朋友矣順
乎親有道反諸身不誠不順乎親矣誠身有道不明乎

善不誠乎身矣注言知善之為善乃能行誠疏

正義曰此明為

臣為人皆須誠信於身然後可得之事在下位不獲乎上者獲得也言人臣處在下位不得於君上之意則不得居位以治民故云民不可得而治矣獲乎上有道不信乎朋友不獲乎上矣者言臣欲得君上之意先須有道德信著朋友若道德無信著乎朋友則不得君上之意矣言欲得上意先須信乎朋友也信乎朋友有道不順乎親則不信乎朋友矣者言欲行信著於朋友先須有道順乎其親若不順乎其親則不信乎朋友矣順乎親有道反於己身使有至誠若身不能至誠則不能順乎親矣誠身有道不明乎善不誠乎身矣者言欲行至誠於身先須有道明乎善行若不明乎善行則不能至誠乎身矣言明乎善行始能至誠乎身能至誠乎身始能順乎親順乎親始能信乎朋友信乎朋友始能得君上

之意得乎君上之意
始得居位治民也

誠者天之道也誠之者人之道也誠者不勉而中不思
而得從容中道聖人也誠之者擇善而固執之者也注
言誠者天性也誠之者學而誠之者也因誠身說有大

至誠音義

中丁仲反又如字下
中道同從七容反

疏

正義曰前經欲明事
君先須身有至誠此

經明至誠之道天之性也則人當學其至誠之性是上
天之道不為而誠不思而得若天之性自然信著四時
是天之道誠之者人之道也者言人能勉力學此至誠
是入之道也不學則不得故云人之道誠者不勉而中
不思而得從容中道聖人也者此覆說上文誠者天之
道也唯聖人能然謂不勉勵而自中當於善不思慮而

自得於善從容閒暇而自中乎道以聖人性合於天道自然故云聖人也誠之者擇善而固執之者也者此覆說上文誠之者人之道也謂由學而致此至誠謂賢人也言選擇善事而堅固執之行之不已遂致至誠也注正義曰以前經云欲事親事君先須修身有大至誠故此說有大至誠大至誠則經云誠者天之道也聖人是矣

博學之審問之慎思之明辨之篤行之有弗學學之弗能弗措也有弗問問之弗知弗措也有弗思思之弗得弗措也有弗辨辨之弗明弗措也有弗行行之弗篤弗措也人一能之己百之人十能之己千之果能此道矣

雖愚必明雖柔必強注此勸人學誠其身也果猶決也

音義

措七路反下及注皆同置也強其良反

疏

正義曰此一經申明上經誠之者擇善而固執之事

有弗學學之弗能弗措也者謂身有事不能常學習常須勤力學之措置也言學不至於能不措置休廢必待能之乃已也以下諸事皆然此一句覆上博學之也有弗問問之弗知弗措也覆上審問之也有弗思思之弗得弗措也覆上慎思之也有弗辨辨之弗明弗措也覆上明辨之也有弗行之弗篤弗措也覆上篤行之也人一能之已百之人十能之已千之者謂他人性識聰敏一學則能知之已當百倍用功而學使能知之言已加心精勤之多恒百倍於他人也果能此道矣雖愚必明雖柔必強者果謂果決也若決能為此百倍用功之道識慮雖復愚弱而必至明強此勸人學誠其身也

自誠明謂之性自明誠謂之教誠則明矣明則誠矣注

自由也由至誠而有明德是聖人之性者也由明德而

有至誠是賢人學以成之也有至誠則必有明德有明

德則必有至誠疏

正義曰此一經顯天性至誠或學而能兩者雖異功用則相通自誠明謂

之性者此說天性自誠者自由也言由天性至誠而身有明德此乃自然天性如此故謂之性自明誠謂之教者此自明而至誠由身聰明勉力學習而致至誠非由天性教習而致故云謂之教然則自誠明謂之性聖人之德也自明誠謂之教賢人之德也誠則明矣者言聖人天性至誠則能明其德由至誠而致明也明則誠矣者謂賢人由身聰明勉學乃致至誠故云明則誠矣是誠則能明明則能誠優劣雖異二者皆通有至誠也

唯天下至誠為能盡其性能盡其性則能盡人之性能
盡人之性則能盡物之性能盡物之性則可以贊天地
之化育可以贊天地之化育則可以與天地參矣注盡
性者謂順理之使不失其所也贊助也育生也助天地
之化生謂聖人受命在王位致大平音義

大音疏正義
泰曰此

明天性至誠聖人之道也唯天下至誠者謂一天下之
內至極誠信為聖人也為能盡其性者以其至極誠信
與天地合故能盡其性既盡其性則能盡其人與萬物
之性是以以下云能盡人之性既能盡人性則能盡萬物
之性故能贊助天地之化育功與天地相參上云誠者
天之道此兼云地者上說至誠之理自神妙而來故特

云天之道此據化育
生物故并云地也

其次致曲曲能有誠誠則形形則著著則明明則動動
則變變則化唯天下至誠為能化注其次謂自明誠者
也致至也曲猶小小之事也不能盡性而有至誠於有
義焉而已形謂人見其功也盡性之誠人不能見也著
形之大者也明著之顯者也動動人心也變改惡為善
也變之久則化而性善也疏正義曰此一經明賢人習
學而致至誠故云其次致
曲曲謂細小之事言其賢人致行細小之事不能盡性
於細小之事能有至誠也誠則形形則著者謂不能自

然至誠由學而來故誠則人見其功是誠則形也初有小形後乃大而明著故云形則著也若天性至誠之人不能見則不形不著也著則明明則動者由著故顯明由明能感動於衆動則變變則化者既感動人心漸變惡為善變而既久遂至於化言惡人全化為善人無復為惡也唯天下至誠為能化言唯天下學致至誠之人為能化惡為善改移舊俗不如前經天生至誠能盡其性與天地參矣注正義曰以前經云自明誠謂之教是由明而致誠是賢人次於聖人故云其次謂自明誠也云不能盡性而有至誠於有義焉而已者言此次誠不能如至誠盡物之性但能有至誠於細小物焉而已云形謂人見其功也者由次誠彰露人皆見其功也云盡性之誠人不能見也者言天性至誠神妙無體人不見也云著形之大者也解經形則著初有微形後則大而形成著云變之久則化而性善也者解經變則化初漸謂之變變時新舊兩體俱有變盡舊體而有新體謂之為

化如月令鳩化為鷹是為鷹之時
非復鳩也猶如善人無復有惡也

至誠之道可以前知國家將興必有禎祥國家將亡必

有妖孽見乎蓍龜動乎四體禍福將至善必先知之不

善必先知之故至誠如神注可以前知者言天不欺至

誠者也前亦先也禎祥妖孽蓍龜之占雖其時有小人

愚主皆為至誠能知者出也四體謂龜之四足春占後

左夏占前左秋占前右冬占後右音義

禎音貞妖於驕反左傳云地反

物為妖說文作禎云衣服歌謠草木之怪謂之禎孽魚
列反說文作孽云禽獸蟲蝗之怪謂之孽見乎賢通反

下不見注著見同一本乎疏正義曰至誠之道可以前
作於著音尸為于偽反知者此由身有至誠可以

豫知前事此至誠之內是天生至誠亦通學而至誠故
前經云自明誠謂之教是賢人至誠同聖人也言聖人

賢人俱有至誠之行天所不欺可知前事國家將興必
有禎祥者禎祥吉之萌兆祥善也言國家之將興必先

有嘉慶善祥也文說禎祥者言人有至誠天地不能隱
如文王有至誠招赤雀之瑞也國本有今異曰禎本無

今有曰祥何為本有今異者何唐云國本有雀今有赤
雀來是禎也國本無鳳今有鳳來是祥也尚書祥桑穀

共生于朝是惡此經云善何得入國者以吉凶先見者
皆曰祥別無義也國家將亡必有妖孽者妖孽謂凶惡

之萌兆也妖猶傷也傷甚曰孽謂惡物來為妖傷之徵
若魯國鸛鵲來巢以為國之傷徵案左傳云地反物為

妖說文云衣服歌謠草木之怪為妖禽獸蟲蝗之怪為
孽見乎著龜動乎四體者所以先知禎祥妖孽見乎著

龜卦兆發動於龜之四體也禍福將至者禍福妖孽福謂禎祥萌兆豫來是禍福將至善必先知之者善謂福也不善必先知之者不善謂禍也故至誠如神者言至誠之道豫知前事如神之微妙故云至誠如神也注正義曰鄭以聖人君子將興之時或聖人有至誠或賢人有至誠則國之將興禎祥可知而小人愚主之世無至誠又時無賢人亦無至誠所以得知國家之將亡而有妖孽者雖小人愚主由至誠之人生在亂世猶有至誠之德此妖孽為有至誠能知者出也案周語云幽王二年三川皆震伯陽父曰周將亡矣昔伊洛竭而夏亡河竭而商亡時三川皆震為周之惡瑞是伯陽父有至誠能知周亡也又周惠王十五年有神降于莘莘虢國地名周惠王問內史過史過對曰夏之興也祝融降于崇山其亡也回祿信于聆隧商之興也禱杙次於丕山其亡也夷羊在牧周之興也鷺鷥鳴於岐山其衰也杜伯射宣王於鎬今虢多涼德虢必亡也是內史過有至誠

有德神為之出是愚主之世
以妖孽為至誠能知者出也

誠者自成也而道自道也注言人能至誠所以自誠也

有道藝所以自道也音義

自道音導
注自道同

誠者物之終始不

誠無物注物萬物也亦事也大人無誠萬物不生小人

無誠則事不成是故君子誠之為貴注言貴至誠誠者

非自成已而已也所以成物也成已仁也成物知也性

之德也合外內之道也注以至誠成已則仁道立以至

誠成物則知彌博此五性之所以為德也外內所須而

合也外內猶上下音義

知音智注同

故時措之宜也注時措

言得其時而用也故至誠無息不息則久久則徵徵則

悠遠悠遠則博厚博厚則高明注徵猶效驗也此言至

誠之德既著於四方其高厚日以廣大也徵或為徹博

厚所以載物也高明所以覆物也悠久所以成物也博

厚配地高明配天悠久無疆注後言悠久者言至誠之

德既至博厚高明配乎天地又欲其長久行之音義

居疆

良如此者不見而章不動而變無為而成天地之道可

一言而盡也注言其德化與天地相似可一言而盡要

在至誠其為物不貳則其生物不測注言至誠無貳乃

能生萬物多無數也音義

不貳本亦作儼音二

天地之道博也厚

也高也明也悠也久也注此言其著見成功也疏

正義曰此

經明已有至誠能成就物也誠者自成也而道自道也者言人能有至誠之德則自成就其身故云誠者自成也若人有道藝則能自道達於己故云而道自道也誠者物之終始不誠無物者言人有至誠則能與萬物為終始若無至誠則不能成其物若大人無至誠則不能生萬物若小人無至誠則不能成其物猶事也小人無誠則不能成事誠者非自成己而已也所以成物也者言人有至誠非但自成己身而已又能成就外物

成己仁也成物知也者若能成就外物則知力廣遠故云成物知也性之德也者言誠者是人五性之德則仁義禮智信皆猶至誠而為德故云性之德也合外內之道也者言至誠之行合於外內之道無間外內皆須至誠於人事言之有外有內於萬物言之外內猶上下上謂天下謂地天體高明故為外地體博厚閉藏故為內也是至誠合天地之道也故時措之宜也者措猶用也言至誠者成萬物之性合天地之道故得時而用之則無往而不宜故注云時措言得其時而用也故至誠無息者言至誠之德所用皆宜無有止息故能久遠博厚高明以配天地也不息則久者以其不息故能長久也久則徵徵驗也以其久行故有徵驗徵則悠遠者悠長也若事有徵驗則可行長遠也悠遠則博厚以其德既長遠無所不周故博厚也養物博厚則功業顯著故博厚則高明也博厚所以載物也以其德博厚所以負載於物高明

所以覆物也以其功業高明所以覆蓋於萬物也悠久所以成物也以其行之長久能成就於物此謂至誠之德也博厚配地言聖人之德博厚配偶於地與地同功能載物也高明配天言聖人功業高明配偶於天與天同功能覆物也悠久無疆疆窮也言聖人之德既能覆載又能長久行之所以無窮悠久即上經悠遠悠久在博厚高明之上此經悠久在博厚高明之下者上經欲明積漸先悠久後能博厚高明此經既能博厚高明又須行之悠久故反覆言之如此者不見而章不動而變無為而成者言聖人之德如此博厚高明悠久不見所為而功業章顯不見動作而萬物改變無所施為而道德成就天地之道可一言而盡也者言聖人之德能同於天地之道欲尋求所由可一句之言而能盡其事理正由於至誠是一言而盡也其為物不貳則其生物不測者言聖人行至誠接待於物不有差貳以此之故能生殖衆物不可測量故鄭云言多無數也

今夫天斯昭昭之多及其無窮也日月星辰繫焉萬物
覆焉今夫地一撮土之多及其廣厚載華嶽而不重振
河海而不洩萬物載焉今夫山一卷石之多及其廣大
草木生之禽獸居之寶藏興焉今夫水一勺之多及其
不測鼃鼃蛟龍魚鼈生焉貨財殖焉注此言天之高明
本生昭昭地之博厚本起撮土山之廣大本起卷石水
之不測本由一勺言天地山川積小致大為至誠者亦
如此乎昭昭猶耿耿小明也振猶收也卷猶區也音義

夫音扶下同昭章遙反注同本亦作焄同撮七活反華

嶽戶化戶瓜二反本亦作山嶽洩息列反卷李音權又

羌權反范羌阮反注同藏才浪反勺徐市若反鼃音元

鼃徒河反一音直丹反蛟音交本又作蛟鼃必列反耿

公迥反又公頂反舊詩曰維天之命於穆不已蓋曰天

之所以為天也於乎不顯文王之德之純蓋曰文王之

所以為文也純亦不已注天所以為天文王所以為文

皆由行之無已為之不止如天地山川之云也易曰君

子以慎德積小以成高大是與音義

慎如字一本又疏正義曰此一節明至誠不已則聖人

作順與音餘至誠亦從小至大今天斯昭昭之

多者斯此也昭昭狹小之貌言天初時唯有此昭昭之多小貌爾故云昭昭之多也今夫地一撮土之多言地之初時唯一撮土之多言多少唯一撮土振河海而不洩者振收也言地之廣大載華嶽而不重振收河海而不多漏泄今夫山一卷石之多言山之初時唯一卷石之多言多少惟一卷石耳故鄭注云卷猶區也今夫水一勺之多言水初時多少惟一勺耳此以下皆言至誠不已從小至大然天之與地造化之初清濁二氣為天地分而成二體元初作盤薄穹隆非是以小至大今云昭昭與撮土卷石與勺水者何但山或壘石為高水或衆流而聚為深自微至著因託聖人至誠之功亦是從小至大以今天地山川假言由小而來以譬至誠非實論也詩曰維天之命於穆不已者此一經以上文至誠不已已能從小至大故此經引詩明不已之事所引詩者周頌維天之命文也詩稱維天之命謂四時運行所為教命穆美也於穆不已者美之不休已也此詩之本文也

蓋曰天之所以為天也此是孔子之言記者載之此詩
所論蓋說天之所以為天在乎不已於乎不顯文王之
德之純此亦周頌文王之詩純謂不雜顯謂光明詩人
歎之云於乎不光明乎言光明矣文王之德之純謂不
已也言文王德教不有休已與天同功蓋曰文王之所
以為文也此亦孔子之言解詩之文也純亦不已者言
文王之德之純亦如天之不休已故云純亦不已注正
義曰易曰君子慎德積小以高大者此易升卦之象詞
案升卦巽下坤上木生於
地中升進之義故為升也

大哉聖人之道洋洋乎發育萬物峻極于天注育生也

峻高大也音義

洋音羊峻
思閏反

優優大哉禮儀三百威儀三

千待其人而後行故曰苟不至德至道不疑焉注言為

政在人政由禮也疑猶成也音義

優於求反倡優也疑本又作疑魚澄反

疏

正義曰此一節明聖人之道高大苟非至德者則其道不成洋洋謂道德充滿之貌天下洋洋然育生也

峻高也聖人之道高大與山相似上極于天也優優大哉者優優寬裕之貌聖人優優然寬裕其道禮儀三百者周禮有三百六十官言三百者舉其成數耳威儀三千者即儀禮行事之威儀也儀禮雖十七篇其中事有三千待其人而後行者言三百三千之禮必待賢人然後施行其事也故曰苟不至德至道不凝焉者凝成也古語先有其文今夫子既言三百三千待賢人始行故引古語證之苟誠也不非也苟誠非至德之人則聖人至極之道不可成也俗本不作非也

故君子尊德性而道問學致廣大而盡精微極高明而

道中庸溫故而知新敦厚以崇禮注德性謂性至誠者
道猶由也問學學誠者也廣大猶博厚也溫讀如煇溫
之溫謂故學之熟矣後時習之謂之溫音義煇音疏正
尋義

曰此一經明君子欲行聖人之道當須勤學前經明聖
人性之至誠此經明聖人學而至誠也君子尊德性者
謂君子賢人尊敬此聖人道德之性自然至誠也而道
問學者言賢人行道由於問學謂勤學乃致至誠也致
廣大而盡精微者廣大謂地也言賢人由學能致廣大
如地之生養之德也而盡精微謂致其生養之德既能
致於廣大盡育物之精微言無微不至也極高明而道
中庸者高明謂天也言賢人由學極盡天之高明之德
道通也又能通達於中庸之理也溫故而知新者言賢
人由學既能溫尋故事又能知新事也敦厚以崇禮者

言以敦厚重行於學故以尊崇三百三千之禮也注正義曰案左傳哀十二年公會吳于索臯大宰詒諸尋盟子貢對曰盟若可尋也亦可寒也賈逵注云尋溫也又有司徹云乃鼓尸俎是燭為溫也云謂故學之熟矣後時習之謂之溫者謂賢人舊學已精熟在後更習之猶若溫尋故食也

是故居上不驕為下不倍國有道其言足以興國無道

其默足以容注興謂起在位也音義

驕本亦作喬音嬌倍音佩默亡北反

詩曰既明且哲以保其身其此之謂與注保安也音義

哲陟列反徐本作知音智與音餘

疏

正義曰此一節明賢人學至誠之道中庸之行若國有道之時盡竭

知謀其言足以興成其國興謂發謀出慮國無道其默足以容若無道之時則韜光潛默足以自容其身免於

禍害詩云既明且哲以保其身此大雅烝民之篇美宣王之詩言宣王任用仲山甫能顯明其事任且又哲知保安全其已身言中庸之人亦能如此故云其此之謂與

子曰愚而好自用賤而好自專生乎今之世反古之道如此者裁及其身者也注反古之道謂曉一孔之人不

知今王之新政可從音義

好呼報反下同
裁音災

非天子不議禮

不制度不考文注此天下所共行天子乃能一之也禮謂人所服行也度國家宮室及車輿也文書名也今天

下車同軌書同文行同倫注今孔子謂其時音義

行下孟反

雖有其位苟無其德不敢作禮樂焉雖有其德苟無其位亦不敢作禮樂焉注言作禮樂者必聖人在天子之

位疏

正義曰上經論賢人學至誠商量國之有道無道能或語或默以保其身若不能中庸者皆不能量

事制宜必及禍患又因明已以此之故不敢專輒制作禮樂也生乎今之世反古之道如此者裁及其身者也此謂尋常之人不知大道若賢人君子雖生今時能持古法故儒行云今人與居古人與稽是也俗本反下有行字又無如此者三字非也非天子不議禮者此論禮由天子所行既非天子不得論議禮之是非不制度謂不敢制造法度及國家官室大小高下及車輿也不考文亦不得考成文章書籍之名也今天下車同軌者今謂孔子時車同軌覆上不制度書同文覆上不考文行同倫倫道也言人所行之行皆同道理覆上不議禮當

孔子時禮壞樂崩家殊國異而云此者欲明已雖有德身無其位不敢造作禮樂故極行而虛已先說以自謙也注正義曰孔謂孔穴孔穴所出事有多塗今唯曉知一孔之人不知餘孔通達唯守此一處故云曉一孔之人

子曰吾說夏禮杞不足徵也吾學殷禮有宋存焉吾學

周禮今用之吾從周注徵猶明也吾能說夏禮顧杞之

君不足與明之也吾從周行今之道音義

杞音起

王天下

有三重焉其寡過矣乎注三重三王之禮音義

王于況反又如

字上焉者雖善無徵無徵不信不信民弗從下焉者雖

善不尊不尊不信不信民弗從注上謂君也君雖善善
無明徵則其善不信也下謂臣也臣雖善善而不尊君
則其善亦不信也徵或為證故君子之道本諸身徵諸
庶民考諸三王而不繆建諸天地而不悖質諸鬼神而
無疑百世以俟聖人而不惑質諸鬼神而無疑知天也
百世以俟聖人而不惑知人也注知天知人謂知其道
也鬼神從天地者也易曰故知鬼神之情狀與天地相
似聖人則之百世同道徵或為證音義

繆音謬悖布是
內反後同

故君子動而世為天下道行而世為天下法言而世為

天下則遠之則有望近之則不厭注用其法度想思若

其將來也音義

遠如字又于萬反近如字又附近之近厭於豔反後皆同

詩曰在彼

無惡在此無射庶幾夙夜以永終譽君子未有不如此

而蚤有譽於天下者也注射厭也永長也音義

射音亦注同蚤

音疏

正義曰以上文孔子身無其位不敢制作二代之禮夏殷不足可從所以獨從周禮之意因明君子

行道須本於身達諸天地質諸鬼神使動則為天下之

道行則為後世之法故能早有名譽於天下蓋孔子微

自明己之意子曰吾說夏禮杞不足徵也者徵成也明也孔子言我欲明說夏代之禮須行夏禮之國贊而成

之杞雖行夏禮其君暗弱不足贊而成之吾學殷禮有
宋存焉者宋行殷禮故云有宋存焉但宋君暗弱欲共
贊明殷禮亦不足可成故論語云宋不足徵也此云杞
不足徵即宋亦不足徵此云有宋存焉則杞亦存焉互
文見義吾學周禮今用之吾從周者既杞宋二國不足
明已當不復行前代之禮故云吾從周案趙商問孔子
稱吾學周禮今用之吾從周禮弓云今丘也殷人也兩
極莫殯哭哭師之處皆所法於殷禮未必由周而云吾從
周者何也鄭答曰今用之者魯與諸侯皆用周之禮法
非專自施於己在宋冠章甫之冠在魯衣逢掖之衣何
必純用之吾從周者言周禮法最備其為殷周事豈一
也如鄭此言諸侯禮法則從周身之所行雜用殷禮也
王天下有三重焉其寡過矣乎者言為君王有天下者
有三種之重焉謂夏殷周三王之禮其事尊重若能行
之寡少於過矣上焉者雖善無徵無徵不信不信民弗
從上謂君也言為君雖有善行無分明徵驗則不信著

於下既不信著則民不從下焉者雖善不尊不尊不信
不信民弗從下謂臣也言臣所行之事雖有善行而不
尊敬於君則善不信著於下既不信著則民不從故下
云徵諸庶民謂行善須有徵驗於庶民也皇氏云無徵
謂無符應之徵其義非也故君子之道者言君臣為善
須有徵驗民乃順從故明之也本諸身者言君子行道
先從身起是本諸身也徵諸庶民者徵驗也諸於也謂
立身行善使有徵驗於庶民若晉文公出定襄王示民
尊上也伐原示民以信之類也考諸三王而不繆者繆
亂也謂已所行之事考校與三王合同不有錯繆也建
諸天地而不悖者悖逆也言已所行之道建達於天地
而不有悖逆謂與天地合也質諸鬼神而無疑知天也
者質正也謂已所行之行正諸鬼神不有疑惑是識知
天道也此鬼神是陰陽七八九六之鬼神生成萬物者
此是天地所為既能質正陰陽不有疑惑是識知天道
也百世以俟聖人而不惑知人也者以聖人身有聖人

之德重法於後雖在後百世亦堪俟待後世之聖人
其道本異故云知人也遠之則有望近之則不厭者言
聖人之道為世法則若遠離之則有企望思慕之深也
若附近之則不厭倦言人愛之無已詩云在彼無惡在
此無射庶幾夙夜以永終譽此引周頌振鷺之篇言微
子來朝身有美德在彼宋國之內民無惡之在此來朝
人無厭倦故庶幾夙夜以長永終竟美善聲譽言君子
之德亦能如此故引詩以結成之君子未有不如如此而
蚤有譽於天下者也言欲蚤有名譽會須如此未嘗有
不行如此而蚤得有聲譽者也注正義曰以經云知天
知人故鄭引經總結之云知其道者以天道陰陽生成
萬物今能正諸陰陽鬼神而不有疑惑是知天道也以
聖入之道雖相去百世其歸一揆今能百世以待聖人
而不有疑惑是知聖人之道也云鬼神從天地者也解
所以贊諸鬼神之神知天道之意引易曰故知鬼神之
情狀與天地相似者證鬼神從天地之意案易繫辭云

精氣為物遊魂為變鄭云木火之神生物金水之鬼成物以七八之神生物九六之鬼成物是鬼神以生成為功天地亦以生成為務是鬼神之狀與天地相似云聖人則之百世同道解經知人之道以前世聖人既能垂法以俟待後世聖人是識知聖人之道百世不殊故聖人則之百世同道也

仲尼祖述堯舜憲章文武上律天時下襲水土注此以春秋之義說孔子之德孔子曰吾志在春秋行在孝經二經固足以明之孔子祖述堯舜之道而制春秋而斷以文王武王之法度春秋傳曰君子曷為為春秋撥亂世反諸正莫近諸春秋其諸君子樂道堯舜之道與末

不亦樂乎堯舜之知君子也又曰是子也繼文王之體

守文王之法度文王之法無求而求故譏之也又曰王

者孰謂謂文王也此孔子兼包堯舜文武之盛德而著

之春秋以俟後聖者也律述也述天時謂編年四時具

也襲因也因水土謂記諸夏之事山川之異音義

行下孟反

斷丁亂反曷為于偽反又如字撥半未反近附辟如天

近之近又如字與音餘編必縣反又甫連反

辟如天

地之無不持載無不覆幬辟如四時之錯行如日月之

代明萬物並育而不相害道並行而不相悖小德川流

大德敦化此天地之所以為大也注聖人制作其德配

天地如此唯五始可以當焉幬亦覆也小德川流浸潤

萌芽喻諸侯也大德敦化厚生萬物喻天子也幬或作

燾音義

辟音譬下同幬徒報反錯七各反當丁浪反又丁郎反浸子鳩反燾徒報反

唯天下

至聖為能聰明睿知足以有臨也寬裕溫柔足以有容

也發強剛毅足以有執也齊莊中正足以有敬也文理

密察足以有別也注言德不如此不可以君天下也蓋

傷孔子有其德而無其命音義

睿音銳知音智下聖知同齊側皆反別彼列反

溥博淵泉而時出之注言其臨下普遍思慮深重非得

其時不出政教音義

溥音普徧音遍思
息嗣反又如字

溥博如天淵泉

如淵見而民莫不敬言而民莫不信行而民莫不說是

以聲名洋溢乎中國施及蠻貊舟車所至人力所通天

之所覆地之所載日月所照霜露所隊凡有血氣者莫

不尊親故曰配天注如天取其運照不已也如淵取其

清深不測也尊親尊而親之音義

見賢遍反說音悅施
以鼓反貊本又作貊

武伯反說文云北
方人也隊直類反

唯天下至誠為能經綸天下之大經

立天下之大本知天地之化育注至誠性至誠謂孔子

也大經謂六藝而指春秋也大本孝經也音義

綸本又作論同

音倫夫焉有所倚肫肫其仁淵淵其淵浩浩其天注安有

所倚言無所偏倚也而人人自以被德尤厚似偏頗者

肫肫讀如誨爾恇恇之恇恇態誠貌也肫肫或為純

純音義

馬於虔反倚依綺於寄二反注同肫依注音之淳反浩胡老反被皮義反頗破河反懇口狠反

純音淳又之淳反

苟不固聰明聖知達天德者其孰能知之注

言唯聖人乃能知聖人也春秋傳曰末不亦樂乎堯舜

之知君子明凡人不知詩曰衣錦尚絀惡其文之著也

故君子之道闇然而日章小人之道的然而日亡注言

君子深遠難知小人淺近易知人所以不知孔子以其

深遠禪為絀錦衣之美而君子以絀表之為其文章露

見似小人也音義

絀本又作顯詩作聚同口迥反徐口定反一音口顯反惡烏路反著張慮

反闇於感反又如字日而一反下同的丁歷反易以君

君

子之道淡而不厭簡而文溫而理知遠之近知風之自

知微之顯可與入德矣注淡其味似薄也簡而文溫而

理猶簡而辨直而溫也自所謂從來也三知者皆言其

睹末察本探端知緒也入德入聖人之德音義

淡徒暫反又大

敢反下注同厥於監反睹音覩探音貪

詩云潛雖伏矣亦孔之昭故君子

內省不疚無惡於志注孔甚也昭明也言聖人雖隱居

其德亦甚明矣疚病也君子自省身無愆病雖不遇世

亦無損害於己志音義

昭本又作炤同之召反又章遙反疚九又反遯大困反本又作

遁字亦同愆起虔反

君子之所不可及者其唯人之所不見乎詩

云相在爾室尚不愧于屋漏注言君子雖隱居不失其

君子之容德也相視也室西北隅謂之屋漏視女在室

獨居耳猶不愧于屋漏屋漏非有人也况有人乎音義

相息亮反注同愧本又故君子不動而敬不言而信詩

作媿同九位反女音汝

曰奏假無言時靡有爭注假大也此頌也言奏大樂於

宗廟之中人皆肅敬金聲玉色無有言者以時大平和

合無所爭也音義

奏如字詩作驤子公反假古雅反爭爭闕之爭注同大平音泰

是故

君子不賞而民勸不怒而民威於鈇鉞詩曰不顯惟德

百辟其刑之注不顯言顯也辟君也此頌也言不顯乎

文王之德百君盡刑之諸侯法之也音義

鈇方于反又音斧鈇音越

辟音壁注同

是故君子篤恭而天下平詩曰予懷明德不大

聲以色注子我也懷歸也言我歸有明德者以其不大

聲為嚴厲之色以威我也疏

正義曰此一節明子思申明夫子之德與天地相似

堪以配天地而育萬物傷有聖德無其位也今各隨文解之仲尼祖述堯舜者祖始也言仲尼祖述始行堯舜之道也憲章文武者憲法也章明也言夫子發明文武之德上律天時者律述也言夫子上則述行天時以與言陰陽時候也下襲水土者襲因也下則因襲諸侯之事水土所在此言子思贊揚聖祖之德以仲尼修春秋而有此等之事也譬如至大也者此明孔子之德與天地日月相似與天子諸侯德化無異小德川流大德敦

化者言孔子所作春秋若以諸侯小德言之如川水之
流浸潤萌芽若以天子大德言之則仁愛敦厚化生萬
物也此天地之所以為大也言夫子之德比並天地所
以為大不可測也唯天至別也者此又申明夫子之德
聰明寬裕足以容養天下傷其有聖德而無位也寬裕
溫柔足以有容也言夫子寬弘性善溫克和柔足以包
容也發強剛毅足以有執也發起也執猶斷也言孔子
發起志意堅強剛毅足以斷決事物也溥博至配天者
此節更申明夫子蘊蓄聖德俟時而出日月所照之處
無不尊仰溥博淵泉者溥謂無不周徧博謂所及廣遠
以其浸潤之澤如似淵泉溥大也既思慮深重非得其
時不出政教必以俟時而出溥博如天者言似天無不
覆轉淵泉如淵者言潤澤深厚如川水之流夫焉至其
天者以前經贊明夫子之德此又云夫子無所偏倚而
仁德自然盛大也倚謂偏有所倚近言夫子之德普被
於人何有獨倚近於一人言不待有偏頗也肫肫其仁

肫肫懇誠之貌仁謂施惠仁厚言又能肫肫然懇誠行此仁厚爾淵淵其淵淵水深之貌也言夫子之德淵淵然若水之深也浩浩其天言夫子之德浩浩盛大其若如天也苟不固聰明聖知達天德者其孰能知之者上經論夫子之德大如天此經論唯至聖乃知夫子之德苟誠也固堅固也言帝誠不堅固聰明睿聖通知曉達天德者其誰能識知夫子之德故注引公羊傳云堯舜之知君子者言有堯舜之德乃知夫子明凡人不知也詩曰衣錦尚絅惡其文之著也者以前經論夫子之德難知故此經因明君子小人隱顯不同之事此詩衛風碩人之篇美莊姜之詩言莊姜初嫁在塗衣著錦衣為其文之大著尚著禪絅加於錦衣之上絅禪也以單縠為衣尚以覆錦衣也案詩本文云衣錦褰裳又與定本不同者者斷截詩文也又俗本云衣錦褰裳又與定本不同者記人欲明君子謙退惡其文之彰著故引詩以結之故君子之道闇然而日章者章明也言君子以其道德深

遠謙退初視未見故曰闇然其後明著故曰日章明也
小人之道的然而日亡者若小人好自矜大故初視時
的然以其才藝淺近後無所取故曰日益亡君子至德
矣者此一經明君子之道察微知著故能入德淡而不
厭者言不媚悅於人初似淡薄久而愈敬無惡可厭也
簡而文者性無嗜慾故簡靜才藝明辨故有文也溫而
理者氣性和潤故溫也正直不違故脩理也知遠之
近者言欲知遠處必先之適於近乃後及遠知風之
自者自謂所從來處言見目前之風則知風之適所
從來處故鄭注云睹末察本遠是近之末風是所從
來之末也知微之顯此初時所微之事久乃適於顯明
微是初端顯是縱緒故鄭注云探端知緒可與入德矣
言君子或探末以知本或睹本而知末察微知著終始
皆知故可以入聖人之德矣詩曰潛雖伏矣亦孔之昭
者此明君子其身雖隱其德昭著所引者小雅正月之
篇刺幽王之詩詩之本文以幽王無道喻賢人君子雖

隱其身而德甚明著不能免禍害猶如魚伏於水亦甚著見被人採捕記者斷章取義言賢人君子身雖藏隱猶如魚伏於水其道德亦甚彰矣故君子內省不疚無惡於志者疾病也言君子雖不遇世內自省身不有愆無病則亦不損害於己志言守志彌堅固也君子至屋漏者此明君子之間居獨處不敢為非故云君子所不可及者其唯人之所不見乎詩云相在爾室尚不愧于屋漏此大雅抑之篇刺厲王之詩詩人意稱王朝小人不敬鬼神瞻視女在廟堂之中猶尚不愧畏於屋漏之神記者引之斷章取義言君子之人在室之中屋漏雖無人之處不敢為非猶愧懼于屋漏之神况有人之處君子愧懼可知也言君子雖獨居常能恭敬故君子不動而敬不言而信者以君子敬懼如是故不動而民敬之不言而民信之詩曰奏假無言時靡有爭此商頌烈祖之篇美成湯之詩詩本文云醜假無言此云奏假者與詩文異也假大也言祭成湯之時奏此大樂於宗廟之

中人皆敬肅無有誼譁之言所以然者時既太平無有
爭訟之事故無言也引證君子不言而民信詩曰不顯
惟德百辟其刑之者此周頌烈文之篇美文王之德不
顯乎文王之德言其顯矣以道德顯著故天下百辟諸
侯皆刑法之引之者證君子之德猶美文王其德顯明
在外明衆人皆刑法之詩云予懷明德不大聲以色者
此大雅皇矣之篇美文王之詩予我也懷歸也言天謂
文王曰我歸就爾之明德所以歸之者以文王不大作
音聲以為嚴厲之色故歸之記者引之證君子亦不作
大音聲以為嚴厲之色與文王同也注正義曰吾志在
春秋行在孝經者孝經緯文言褒貶諸侯善惡志在於
春秋人倫尊卑之行在於孝經云二經固足以明之者
此是鄭語言春秋孝經足以顯明先祖述憲章之事云
孔子祖述堯舜之道而制春秋者則下文所引公羊傳
云君子樂道堯舜之道與是也云斷以文王武王之法
度者則下文引公羊云王者孰謂謂文王是也云春秋

傳曰至堯舜之知君子也哀十四年公羊傳文引之者
證祖述堯舜之事君子曷為為春秋曷何也君子謂孔
子傳曰孔子何為作春秋云撥亂世反諸正莫近諸春
秋者此傳之文答孔子為春秋之意何休云撥猶治也
言欲治於亂世使反歸正道莫近莫過也言餘書莫過
於春秋言治亂世者春秋最近之也云其諸君子樂道
堯舜之道與者上道論道下道謂道德與語辭言君子
孔子也言孔子樂欲論道堯舜之道德也云末不亦樂
乎堯舜之知君子也者末謂終末謂孔子末聖漢之初
豈不亦愛樂堯舜之知君子也案何休云得麟之後天
下血書魯端門曰趙作法孔聖沒周姬亡彗東出秦政
起胡破術書記散孔不絕子夏明日往視之血書飛為
赤鳥化為白書漢當繼大亂之後故作撥亂之法是其
事也云又曰是予也繼文王之體守文王之法度文王
之法無求而求故譏之也者此文九年公羊傳文八年
天王崩謂周襄王也九年春毛伯來求金傳云是予繼

文王之體守文王之法度文王之法無求而求故讓之
是予謂嗣位之王在喪未合稱王故稱是予嗣位之王
守文王之法度文王之法度無所求也謂三分有二以
服事殷謂在喪之內無合求金之法度今遣毛伯來求
金是無求而求也故書以譏之彼傳云是予俗本云子
是者誤也云又曰王者孰謂謂文王也此隱元年公羊
傳文案傳云元年春王正月王者孰謂謂文王也武王
道同舉文王可知也云著之春秋以俟後聖者也哀十
四年公羊傳云制春秋之義以俟後聖何休云待聖漢
之王以為法也云述天時謂編年四時具也案合成圖
云皇帝立五始制以天道元命包云諸侯不上奉王之
正則不得即位正不由王出不得為正王不承於天以
制號令則無法天不得正其元則不能成其元也五始
者元年一也春二也王三也正月四也公即位五也此
春秋元年即當堯典欽若昊天也春秋四時即當堯典
日中星鳥日永星火宵中星虛日短星昴之類是也春

秋獲麟則當益稷百獸率舞鳳凰來儀是也此皆祖述堯舜之事言春秋四時皆具桓四年及七年不書秋七月冬十月成十年不書冬十月桓十七年直云五月不云夏昭十年直云十二月不云冬如此不具者賈服之義若登臺而不視朔則書時不書月若視朔而不登臺則書月不書時若雖無事視朔登臺則空書時月若杜元凱之意凡時月不具者皆史闕文其公羊穀梁之義各為曲說今略而不取也云襲因也因水土謂記諸夏之事山川之異者諸夏之事謂諸侯征伐會盟所在之地山川之異若僖十四年沙鹿崩成五年梁山崩之屬是也肫肫讀如誨爾忱忱之忱者此大雅抑之篇刺厲王之詩言詩人誨爾厲王忱忱然懇誠不已厲王聽我藐藐然而不入也孔甚也者爾雅釋言文言君子雖隱居不失其君子之容德也者隱居謂在室獨居猶不愧畏無人之處又常能恭敬是不失其君子之容德也云西北隅謂之屋漏者爾雅釋宮文以戶明漏照其處故

稱屋漏屋漏非有人者言人之所居多近於戶屋漏深
邃之處非人所居故云非有人也云况有人乎者言無
人之處尚不愧之况有人之處不愧之可知也言君子
無問有人無人恒能畏懼也假大也者爾雅釋詁文辟
君也者爾雅釋詁文

子曰聲色之於以化民末也詩曰德輶如毛注輶輕也

言化民當以德德之易舉而用其輕如毛耳音義

末亡
曷反

輶音酉一音由
注同曷以豉反

毛猶有倫上天之載無聲無臭至矣注

倫猶比也載讀曰裁謂生物也言毛雖輕尚有所比有
所比則有重上天之造生萬物人無聞其聲音亦無知

其臭氣者化民之德清明如神淵淵浩浩然後善音義

載依注讀曰裁音災生也詩音再比必履反下同或疏音毗志反又必利反皆非也重直勇反又直容反

疏

正義曰此一節是夫子之言子思既說君子之德不大聲以色引夫子舊語聲色之事以接之言化民之法當以德為本不用聲色以化民也若用聲色化民是其末事故云化民末也詩曰德輶如毛者此大雅烝民之篇美宣王之詩輶輕也言用德化民舉行甚易其輕如毛也毛猶有倫倫比也既引詩文德輶如毛又言德之至極本自無體何直如毛毛雖細物猶有形體可比並故云毛猶有倫也上天之載無聲無臭至矣載生也言天之生物無音聲無臭氣寂然無象而物自生言聖人用德化民亦無音聲亦無臭氣而人自化是聖人之德至極與天地同此二句是大雅文王之詩美文王之德不言詩云者孔子略而不言直取詩之文爾此亦斷章取

義注正義曰案文以載為事此讀為裁者言其生物故
讀載為裁也云毛雖輕尚有所比則有重言毛雖輕物
尚有形體以他物來比有可比之形則是有重毛在虛
中猶得墜下是有重也云化民之德清明如神淵淵浩
浩則上文淵淵其
淵浩浩其天是也

禮記注疏卷五十三

禮記注疏卷五十三考證

在下位○

臣召南

按此分卷無理又自此文至雖柔必

強分為三節尤為割裂朱子章句斷自哀公問政為一章不可易已

博學之○朱子曰博學之以下家語無之意彼有關文抑此或子思所補也歟

見乎著龜動乎四體注四體謂龜之四足春占後左云云○臣召南按此注最陋若如其說則經言見乎著

龜一句足矣何必複說乎且上著龜並言此又單說
龜亦非辭也鄭以誤據龜筮列傳而失之疏尚書祥
桑穀共生於朝是惡此經云善何得入國者○按此
文有誤何得入國者五字不可解當是衍文

誠者自成也○注疏以此文至悠也久也為一章其意
以至誠無息以下皆言成物之極功也若其斷今夫
天至純一不已另為一節則無義矣

今夫天疏○疏中闕文四處俱闕四字

維天之命注易曰君子以慎德積小以成高大○慎德
舊本作順德今改正成高大易無成字當是衍文

大哉聖人之道至不凝焉疏○此疏闕文共十處俱闕

十一字遂不可句臣召南按禮儀三百威儀三千疏

文僅存者云言三百者舉其成數耳推按文勢上文
似云禮儀即周禮其官三百六十言三百者舉其成
數耳又云儀禮雖十七篇其中事有三千上文似云
威儀即儀禮言儀文委曲也禮器曰經禮三百曲禮

三千注曰經禮謂周禮也周禮六篇其官有三百六十曲猶事也謂今禮也禮篇多亡本數未聞其中事儀三千是鄭以儀禮即曲禮但不云三千之儀已盡於高堂所傳之十七篇耳此疏雖上下有闕而云儀禮雖十七篇其中事有三千則推明鄭說而未瑩者也

故君子尊德性而道問學疏○疏中闕文六處一處闕九字三處並闕十字又二處闕二字

臣召南

按此及

居上不驕節並另為章無條貫矣又以子曰吾說夏
禮為王天下有三重章之首不過因有子曰二字便
為分章耳

王天下有三重焉注三重三王之禮○朱子曰程子亦
因鄭注然於文義不通呂氏曰謂議禮制度考文也
說為得之

上焉者注上謂君也○臣召南按注以上焉者為君下

焉者為臣終屬強解朱子曰上焉者謂時王以前下

焉者謂聖人在下經意了然

仲尼祖述堯舜注孔子祖述堯舜之道而制春秋云云

○臣召南

按鄭解中庸之妄此章為最此經贊孔子

中庸之德冠古今而同天地不止言刪定六經也況
祇以春秋當之乎因公羊傳以春王為文王獲麟傳
有樂道堯舜之語遂附會以成其說解上律下襲則
以編年記事釋之解小德大德則以諸侯天子喻之
無已則又以大經為春秋以大本為孝經矣孔疏但

知附注不能据經以辨其妄何哉

惟天下至聖○

臣召南

按此及惟天下至誠經綸章並

連接祖述堯舜章下猶可說也衣錦尚絅至不大聲
以色並通前為一章則文義並舛矣

浩浩其天䟽浩浩盛大其若如天也○按其若二字並
衍

知風之自䟽○䟽闕五字

子曰聲色之於以化民䟽子思既說君子之德不大聲

以色列夫子舊語聲色之事以接之云云○

臣召南

按疏於衣錦節云以前經論夫子之德難知故此經云云則孔氏亦明知衣錦之自為一章而此節當與不大聲以色列相接連矣拘於鄭注遂至分章無理又按中庸一篇雖雜在記中自古亦自單行隋志有宋戴顓中庸傳二卷梁武帝中庸講疏一卷唐李翱有中庸說宋仁宗天聖以還每書中庸賜新進士其書之重久矣但自程子以前俱墨守鄭注耳

禮記注疏卷五十三考證

謹案卷五十二第一頁前八行注率循也刊本率
訛幸今改

第四頁前三行疏得其濁氣闔者刊本闔訛簡今
改

第七頁前二行疏此為無知之人設譬也刊本為
訛謂今改

前四行疏入罪禍之中刊本監本毛本脫入字據
宋本增

第九頁前一行疏故入性剛猛刊本性訛生今改
前八行疏不能隨逐物以求榮利刊本求訛來今
改

後四行注恥之也諸本恥訛取據宋本改

第十一頁後四行疏諸本脫知之易三字據宋本
增

第十二頁後一行疏謂干與也刊本干訛于今改
第十六頁後八行疏此小雅常棣之篇刊本常訛

棠今改

第二十頁後四行注壹用兵伐殷也刊本用訛月
今改

第二十三頁後一行疏惟后稷及太王王季之等
諸本惟訛雖據宋本改

第二十四頁前二行注旅酬下為上者刊本為訛
位今改

第二十七頁前三行經或安而行之刊本脫行字

金史四
今增

第二十八頁前五行疏知仁勇三者天下之達德也刊本仁下衍者字今刪

第三十頁前一行疏謂謀國家大事諸本脫謂字據宋本增

第三十一頁後六行疏故讀既為餽刊本既訛餽今改

卷五十三第七頁前三行注所以自道也刊本也

訛達今改

第九頁前三行疏悠久即上經悠遠刊本即訛則
今改

前六行疏功業章顯刊本章訛意今改
後二行經及其廣厚刊本厚訛大今改

第十頁前二行音義蛟音交本又作鮫刊本蛟鮫
字互訛今改正

後一行疏諸本闕狹小之貌四字又之多也三字

據宋本補

後二行疏闕多少唯一四字據宋本補

後四行疏闕天地分而四字據宋本補

第十一頁後二行疏闕人之道高大苟非至德者
則其十二字又下洋洋然育生也七字又峻高
也聖四字又天也優優大五字據宋本補

後三行疏闕哉者優優寬裕六字又三百二字據

宋本補

後四行疏闕者周禮有三百六十官九字又者即儀禮行事之威儀也十字據宋本補

後五行疏闕待其人而後行者言三百十字又事也故曰苟不至德至道十字又焉下脫者字據宋本補

後六行疏闕夫子既言三百三千待賢十字又不非也苟誠非至德之人十字據宋本補

後七行疏闕極之道不可成也俗本不作十一字

據宋本補

第十二頁前四行疏闕經明君子欲行聖人之九
字又前訛作一又闕誠此經明聖人學而至誠
十字據宋本改補

前五行疏闕尊敬此聖人道德之性自十字又行
道由於問學謂勤學乃十字據宋本補

前七行疏闕無微二字又學極二字據宋本補

第十八頁後二行注不出政教刊本出訛由今改

第二十頁後四行注刊本訛作音義今改

第二十二頁前五行疏衣錦尚絅刊本絅訛襲今

改

後五行風是所從來之末也諸本是所下訛空五

格據宋本連寫





覆校官編修臣朱依魯

校對官庶吉士臣閔惇大

謄錄監生臣吳魯田

謄錄監生臣鄭遇亨